

TUTÚ DÍHNA NÍ CADÚHA TÉ JUÀÁ

Tnúhu sá càháⁿ nàcuáa naníhí tàhú-ó

1 ¹Te yúhú té Juàá càchí tnúhu-í xii-ndo cuèndá Crìstú Yaá càháⁿ nàcuáa cundecu ndihi-o Yă Ndiöxí. Te Crìstú-áⁿ sa ndècu-gá ndéé cútnàhá ní ngáva ñuyíú. Te yúhú ní xiní núù-í ndihi cue téé ní xica cuu ndihi-í nàcuáa càa nacuáa ndùu-gá. Te ní xíndedóho-ndí tnúhu ní cáháⁿ-gá, te ní tendaha-ndí-gá te ní cutnùnì ndáá iní-ndí sá ìⁿ yiqui cuñú cúú-gă. ²Te ní quixi túu-gă ñuyíú-a, te ní xiní-ndí-gă, te xíăⁿ càchí tnúhu ndáá-ndí xii-ndo. Te càchí tnúhu tucu-ndí sá ndécú-gă ndihi Tătá-gă Dútú Ndiöxí ní cùu, te ní quixi-gă ñuyíú-a ní xíndecu-ndí ndihi-gă. Te ní cachí tnúhu-gă xii-ndí sá ndúú tãhú-ó cùndecu ndihi-o Yá Ndiöxí ni caa ni quíhⁿ te núu na quèndáá iní-ó-gă. ³Te xíăⁿ dátúu-ndí núú-ndó nchàa sá ñí xiní-ndí, ndihi nchaa sá ñí xíndedóho-ndí cuèndá cuu ìⁿnuu-o nchàa-o datná nchúhú cúú ìⁿnuu-ndí ndihi Tătá-ó Dútú Ndiöxí, ndihi Déhe-gă Xítohó Jesucristú. ⁴Te xíăⁿ núu tèe-í nchaa tnúhu-a cuèndá cudí iní-ó nchàa-o.

Yá Ndiöxí cúú-gă dàtná ìⁿ ñuhú

⁵Te nchaa tnúhu ní dánèhé ñáhá Xítohó Jesucristú xii-ndí, xíăⁿ dánèhé ñáhà-í xii-ndo. Te ní cachí-gă sá Yă Ndiöxí cúú-gă dàtná ìⁿ ñuhú dáyèhé-gă iní-ó, te ducaⁿ sãtnahá-xi cùu-gă chi ío váha quide-gă, te ñá túú quide-gă ni ìⁿ sá cuèhé sá dúhá. ⁶Te núu càchí-ó sã ndécú-ó ìchi Yá Ndiöxí, te quide-ni-o nchaa sá cuèhé sá dúhá, te dàcuandehnde-o te ñá túú quide ndáá-ó núú-gă. ⁷Te núu na càda váha-o dàtná quidé mèe-gă, te cuu ìⁿnuu-o nchàa-o. Te ndada ndoo ndada nine-gă iní-ó, chi cada càhnu iní-gă nchaa sá cuèhé sá dúhá quide-o, chi diu cuèndá-áⁿ ñí xíhí Déhe-gă Xítohó Jesucristú núú cùrúxí.

⁸Te núu càchí-ó sã ñà túú quide-o ni ìⁿ sá cuèhé sá dúhá, te dándahú-ó mèe-o, te ñá túú quide ndáá-ó núú Yă Ndiöxí. ⁹Te núu na nàhmá-ó nchàa yíca cuèchi-o núú-gă, te mee-gă cada càhnu iní-gă, te ndada ndoo-gă iní-ó, cuèndá cada ndáá-ó cùndecu-o ichi-gă, chi mee-gă ío váha quide-gă te ío ndáá quidé-gă, ducaⁿ ñí cáháⁿ-gă te ducaⁿ quide-gă. ¹⁰Te núu na càchí-ó sã ñà túú quide-o ni ìⁿ sá cuèhé sá dúhá, te quide-o Yá Ndiöxí ìⁿ ñándéhdé,

dico ñá túú ndèhnde-gá. Te ñá túú ndècu tnúhu-gá iní-ó te núu ducaⁿ na càda-o.

Xítohó Jesucrìstú càháⁿ ndàhú-gá cuèndá-ó

2 ¹Te nchòhó ñáyiú cùu datná déhe-í, chìdo tnuní-í nchaa tnúhu-a cuèndá sá vǎ cáda-ndo ñi ìⁿ sá cuèhé sá dúhá. Dico núu ìⁿ-ndo quìde-ni-ndo nándi sá cuèhé sá dúhá, te ndècu ìⁿ Yaá càháⁿ ndàhú cuèndá-ó nǔú Yǎ Ndiǒxí. Te Yaá-áⁿ cúú-gǎ Xítohó Jesucrìstú Yaá quidé ndǎá. ²Te ní xíhí-gá sá cuèndá nchaa yícá cuèchi-o cuèndá ngúndecu váha-o nǔú-gǎ te núu na quíndáá iní-ó-gǎ. Te ñá díú-ní sǎ cuèndá yícá cuèchi nchoo ñi xíhí-gá, chi tnàhá cuèndá nchaa yícá cuèchi ñáyiú ñi càa xico ñuyíú.

³Te núu cada-o nchàa nacuáa càháⁿ Yǎ Ndiǒxí, te cutnùní iní-ó sǎ ndécú-ó ìchi-gá. ⁴Te núu càchí-ó sǎ ndécú-ó ìchi-gá te ñá túú quìde-o nacuáa càháⁿ-gá, te dàcuandehnde-o, te ñá túú quìde ndáá-ó nǔú-gǎ. ⁵Te núu sàndáá ndisa iní-ó tnúhu-gá, te quìde-o nchaa nacuáa càháⁿ-gá, te ducaⁿ te cùu iní ndisa-o-gǎ, te cùtnuní ndáá iní-ó sǎ ndécú-ó ìchi-gá. ⁶Te núu càchí-ó sǎ ndécú-ó ìchi Yá Ndiǒxí, te xìni ñuhu-xi cada ndáá-ó cùndecu-o ñuyíú-a dàtná ní quide ndáá Xítohó Jesucrìstú cútnàhá ní xíndecu-gá ñuyíú-a.

Ndudú sáá

⁷Te nchòhó ñáyiú ndècu ndìhi-í ichi Xítohó Jesucrìstú, ñá túú chìdo tnuní-í ìⁿ tnúhu saa sà cúú-xí-ndó, chi diu-ni tnúhu sá ñi ngúndecu ndìhi-ndo ndéé díhna, tnúhu ní xíndedóho-ndo ndéé cútnàhá ní sàndáá iní-ndó-gǎ, xíǎⁿ chídó tnùní-í. ⁸Te tnúhu-a cùu-xi datná ìⁿ tnúhu saa tèe-í dándàcu iní ñáhà-í xii-ndo nàcuáa ní quide Xítohó Jesucrìstú cútnàhá ní quixi-gá ñuyíú-a ní quide váha-gá, te tnàhá nchòhó ní tñi-ndo tnúhu-gá te quide váha-ndo tnàhá-ndó. Te vitna ìⁿ nduu ìⁿ nduu ta cùu vai ñáyiú ta dàña nchaa sá cuèhé sá dúhá cuǎháⁿ, chi Xítohó Jesucrìstú tá dándixi túu-gá iní-yu cuèndá cutnùní iní-yu nàcuáa ndùu cuèndá Yǎ Ndiǒxí.

⁹Te núu càchí-ó sǎ quidé váha-o, te cùu úhú iní-ó tnàha ñáyiú-o, te xíǎⁿ ñá túú quìde ndáá-ó, chi ndècu-ni-o ichi cuehé ichi duha sá dúcáⁿ quìde-o. ¹⁰Te núu na cùu iní-ó tnàha ñáyiú-o dàtná cúú ìní ñáhá mée Yá Ndiǒxí xii-o ña, te quìde ndáá-ó nǔú-gǎ, te vá cánùichi-o tnaha ñáyiú-o ìⁿ ichi cuehé ichi duha. ¹¹Te núu cùu úhú iní-ó tnàha ñáyiú-o, te ñá túú quìde váha-o nǔú Yǎ Ndiǒxí, chi ndècu-ni-o ichi cuehé ichi duha, te ñá túú cùtnuní iní-ó sǎ quidé-ó. Chi cùu-o datná ìⁿ té ndècu núu née chi ñá cútnùní núu-dě ndéé ichi quíhíⁿ-dé. Ducaⁿ sǎtnahá-xi cùu nchoo chi ñá

cútnùní iní-ó ndèé ichi quíhíⁿ-ó te núu ducaⁿ na càda-o cuu úhú iní-ó tnàha ñáyiu-o.

12Te nchòhó ñáyiu cùu datná déhe-í, yúhú chídó tnùnì-í tnúhu-a ìⁿ núu tütú càchí tnúhu-í xii-ndo sã ñí quide càhnu iní Yă Ndiöxí nchaa cuéchi-ndo, chi ñiu cuèndá-áⁿ ñí xíhí Xítóhó Jesucrìstú. **13**Te nchòhó ñáyiu sacuéhé, yúhú tée-í tnúhu-a sá cúú-xí-ndó chi càháⁿ ndihi-ndo Jèsús, te Yaá-áⁿ sa ndècu-gá ndéé cútnàhá ní ngáva ñuyíú. Te nchòhó ñáyiu nchìcúⁿ-gá tée tucu-í tnúhu-a sá cúú-xí-ndó chi ñá túú sàndáá iní-ndó tnúhu càháⁿ yucu ñävãha.

Te nchaa nchòhó ñáyiu cùu datná déhe-í, tée tucu-í tnúhu-a sá cúú-xí-ndó, chi sa càháⁿ ndihi-ndo Tătá-ó Dütú Ndiöxí. **14**Te nchòhó ñáyiu ni sàhnu, yúhú chídó tnùnì-í tnúhu-a ìⁿ núu tütú chi càháⁿ ndihi-ndo Jèsús, te Yaá-áⁿ sa ndècu-gá ndéé cútnàhá ní ngáva ñuyíú. Te nchòhó ñáyiu nchìcúⁿ-gá, yúhú chídó tnùnì-í tnúhu-a chi ío ñihí ndéé-ndó ndècu-ndo, chi tnèi-ndo tnúhu càháⁿ Yă Ndiöxí. Te ñá túú sàndáá iní-ndó tnúhu càháⁿ yucu ñävãha.

15Te vá cúhúⁿ iní-ndó ñí ìⁿ sá cuèhé sá dúhá ío ñuyíú-a, te ñí vã cání iní-ndó càda-ndo. Chi núu na cùhuⁿ iní-ó nchaa sá cuèhé sá dúhá ío ñuyíú-a ña, te ñá túú Tătá-ó Dütú Ndiöxí ñúhú iní-ó te núu ducaⁿ na càni iní-ó. **16**Te nchaa ñáyiu ñuyíú-a quidè-yu nchaa sá cuèhé sá dúhá, chi ñiu nchaa xíãⁿ cúdí ñí iní-yu cadá-yu. Te nchaa sá cuèhé sá dúhá sàni iní-yu, ndihi nchaa sá xìnì-yu quidè-yu. Te xíquide nínu-yu mèé-yu cuèndá nchaa sá ndécú ndihí-yu. Te nchaa sá ñá túú vãha ní cacu nihnu-xi ñuyíú-a. **17**Te nchaa sá ñá túú vãha ío ñuyíú-a, ndihi nchaa sá sání cuèhé sání dùha iní-yu cuita ndihi nihnu-xi quíhíⁿ. Te nchaa ñáyiu tnèi tnúhu càháⁿ Yă Ndiöxí cundecú-yu ndihi-gá ñí caa ñí quíhíⁿ.

Tnúhu ndáá tnúhu Yá Ndiöxí ndihi tnúhu ndehnde

18Te nchòhó ñáyiu cùu datná déhe-í, sa ñihí-ndó tnúhu sá quíxí ìⁿ tée cunuu-gã-dé cuu úhú iní-dé Crìstú. Te sa xíndecu-gá ñáyiu cùu úhú iní ñáhá xii-gá, núu xíãⁿ cútnùní iní-ó sã sà ta cuyatni nduu naa ñuyíú-a. **19**Te ñáyiu-áⁿ ñí xíndecu ndihi ñàhá-yu xii-o, te ñí queé-yu cuáháⁿ-yu chi ñá túú ní cùu ìⁿnuu-o ndihí-yu. Chi núu dícó ní cùu ìⁿnuu-o ndihí-yu te cundecu ndihi ñàhá-yu xii-o ñí cùu. Te dùha ní cuu cuèndá cutnùní ndáá iní-ó nchaa-o sá ñá túú cùu ìⁿnuu-o ndihí-yu, chi ñá túú sàndáá iní-yu Yá Ndiöxí.

20Te Xítóhó Jesucrìstú ní taxi-gá Espíritú Yă Ndiöxí ndécú ndihi-o, núu xíãⁿ tècú tnùnì-ó tnúhu-gá. **21**Te cuèndá sá xìnì-ndó tnúhu ndáá tnúhu Yá Ndiöxí ñuu xíãⁿ tée-í tnúhu-a, te ñá díú ìⁿ sá ñá cútnùní iní-ndó cùu-xi. Te

sa nàha-ndo sá nì ìíⁿ tnúhu ndehnde ñà túú ñùtnahá-xi núú tnúhu Yá Ndiöxí, chi mee ñine-ni tnúhu ndáá cúú-xí.

22Te nchaa ñáyiú cächí sá ñà díú Jèsús cúú Crìstú Yaá ní tendaha Yă Ndiöxí ní quixi ñuyíú-a dàcuandehndé-yu, te cùu úhú iní-yu Jèsús. Te diu-ní-yu cächí-yu sá ñà díú Dêhe Yá Ndiöxí cúú Jèsús, te sá dúcáⁿ quidé-yu te cùu úhú iní-yu Yá Ndiöxí ndihi Déhe-gá Jèsús. **23**Te nchaa ñáyiú ñá túú sàndáá iní sá Dêhe Yá Ndiöxí cúú Jèsús, ñáyiú-áⁿ ñà túú ndécú-yu ichi Tătá-ó Dütú Ndiöxí. Te nchaa ñáyiú cáháⁿ sá Dêhe Yá Ndiöxí cúú Jèsús, ñáyiú-áⁿ ndécú-yu ichi Tătá-ó Dütú Ndiöxí.

24Te nchaa tnúhu Yá Ndiöxí ní tecú dóho-ndo ndèé díhna, tnúhu-áⁿ cuhuⁿ iní-ndó. Te núu nchaa tnúhu-áⁿ ná cùhuⁿ-ni iní-ndó, te cundecu ndihi-ndo Yă Ndiöxí ndihi Déhe-gá cuèi vá cùndècu túu-ndo ndihi-gá ñuyíú-a. **25**Te Jèsús ní cachí-gá sá ndúú tǎhú-ó cùndecu ndihi-o-gá ni caa ni quíhíⁿ andiu.

26Te cuendá nchaa ñáyiú dándahú ñáhá xii-ndo ní chídó tnùn-í tnúhu-a, **27**dico nchòhó chi ndècu ndihi-ndo Espíritú Yă Ndiöxí sá ñí taxi Xítohó Jesucrìstú. Núu xíáⁿ ñá túú xìni ñuhu-ndo ñáyiú danèhé ñáhá xii-ndo, chi mee Espíritú-gá dánèhé ñáhá-xí nchàa sá vǎha. Te nchaa sá dánèhé ñáhá-xí xii-ndo cuu-xi sá ndàá, te ñá díú ìíⁿ tnúhu ndehnde. Te vitna chí cànchícúⁿ nihnu-ni ichi Yá Ndiöxí dàtná ní sanu ichi ñaha mée Espíritú-gá xii-ndo.

28Te nchòhó ñáyiú cùu datná déhe-í, chí cànchícúⁿ nihnu-ni ichi Xítohó Jesucrìstú, chi cuendá òré ná quíxí tucu-gá ñuyíú-a te vá yùhú-ndó te nì vá cúú càhaⁿ núú-ndó nǔú-gǎ. **29**Te nchòhó sa nàha-ndo sá mée-gǎ quidé ndáá-gá, te sa xìn-í-ndó sǎ ncháá ñáyiú quide ndáá cúú-yu déhe Yá Ndiöxí.

Ñáyiú cùu déhe Yá Ndiöxí

3¹Te chí cuǎha cuendá sá ïo cùu iní ñáhá Tătá-ó Dütú Ndiöxí xii-o cuendá sá cúú-ó dèhe-gá, chi ducaⁿ ñí cachí-gá, te déhe ndisa-gá cúú-ó. Te núu xíáⁿ ñáyiú ndècu ichi cuehé ichi duha ñá cúú quìn-í ñáhǎ-yu xii-o, chi ñá túú xìn-í-yu nàcuáa ndùu cuendá Yă Ndiöxí. **2**Te nchòhó ñáyiú ío cùu iní-í, vitna cùu-o déhe Yá Ndiöxí, te vátá cùtnùn-í váha-gá iní-ó ñàsa cunduu-o ndèé núú cuáháⁿ núú vǎxi. Dico sa cùtnun-í iní-ó sǎ òré ná quixi tucu Xítohó Jesucrìstú te nduu-o dàtná cáá mée-gá, chí quìn-í-ó-gǎ nàcuáa-ni càa nacuáa-ni ndùu-gá. **3**Te nchaa ñáyiú sa ndètu ñaha xii-gá sa ta ngùndecu túha-yu cuáháⁿ, chi ta ndùu ndoo nduu nine iní-yu cuáháⁿ dàtná cáá ndòo caa nine mee-gá.

4Te nchaa ñáyiú quide nándi sá cuèhé sá dúhá ñà túú quide váha-yu núú Yă Ndiöxí, chi ní cachí-gá sá vǎ dúcáⁿ càda-o. **5**Te sa nàha-ndo sá ñí quixi túu Xítohó Jesucrìstú ñuyíú-a cuendá cada cànnu iní-gá nchaa sá

cuèhé sá dúhá quide-o, chi mee-gă ñá túú quide-gá ni ìⁿ sá cuèhé sá dúhá. ⁶Te nchaa ñáyiú ndècu ichi Yá Ndiöxí ñá túú ñùhú-yu ichi cuèhé ichi duha. Te nchaa ñáyiú ñùhu ichi cuehé ichi duha ñá túú xìní-yu nàcuáa ndùu cuendá Xítohó Jesucrìstú te ni ñă túú xìní-yu nása càa-gá. ⁷Te nchòhó ñáyiú cùu datná déhe-í, vá dǎná-ndó mèe-ndo dandahú ñáhá ñáyiú ndècu ichi cuehé ichi duha, chi càchí-yu sá cúú cùndecu-o ichi Yá Ndiöxí te cada-o nǎndi sá cuèhé sá dúhá dico ñá ndáá. Te nchaa ñáyiú quide váha quide ndáá-yu datná quidé mèe Jesús. ⁸Te nchaa ñáyiú ndècu ichi cuehé ichi duha ndècu ndihí-yu yucu ñǎvǎha, chi ducaⁿ quide mee-xi ndéé cútnàhá vátá ngǎva-gá ñuyú. Te xǎⁿ ní quixi Jèsús Déhe Yá Ndiöxí ní dáquéé tǎhú-gă nchaa sá quidé yùcu ñǎvǎha.

⁹Te nchaa ñáyiú ní natuha ichi Yá Ndiöxí ní nduú-yu déhe-gá, te ñá túú-gă quidě-yu nǎndi sá cuèhé sá dúhá chi ní ndada ndoo ní ndada nine-gá iní-yu. Núu xǎⁿ ñá túú-gă quidě-yu nǎndi sá cuèhé sá dúhá, chi ní ngúndecu ndihi ñaha-gă xí-yu. ¹⁰Te cùtnuní iní-ó nǎndi cùu ñáyiú cùu déhe Yá Ndiöxí, te cùtnuní iní-ó nǎndi cùu ñáyiú cùu déhe yucu ñǎvǎha. Te nchaa ñáyiú ñá túú quide ndáá, te cùu úhú iní-yu tnàha ñáyiú-yu, te ñáyiú-áⁿ ñà díú déhe Yá Ndiöxí cúú-yu.

Cuu iní tnáhá-ó ìⁿ ìⁿ-o

¹¹Te ndéé òré ní natuha-o ichi Yá Ndiöxí ní tecú dóho-o sǎ cúú iní-ó tnàha ñáyiú-o. ¹²Te vá cùndùu úhú iní-ó datná ní quide ndíi Cǎin, chi ndíi-áⁿ ñǎ xíndecu ndíi ndihi yucu ñǎvǎha núu xǎⁿ ní sahani ndíi ñaní ndíi. Te ducaⁿ ñǎ quide ndíi chi ní xíndecu ndíi ichi cuèhé ichi duha, te ñaní ndíi ní xíndecu-dé ichi váha.

¹³Te nchòhó ñáyiú ndècu ndihí-í ichi Xítohó Jesucrìstú, vá cáda cuendá-ndó sǎ cúú úhú iní ñáhá nchàa ñáyiú ndècu ichi cuehé ichi duha xii-ndo. ¹⁴Te cunaha-ndo na càchí tnúhu-í xii-ndo sǎ ñùu na cùu iní-ó tnàha ñáyiú-o, te cùtnuní iní-ó sǎ sà ní dǎná-ó ichi sá tá dàcuíta nihnu ñaha xii-o cuáháⁿ ní cùu, te vitna ní tñii-o ichi váha. Te nchaa ñáyiú ñá túú cùu iní tnàha ñáyiú-xi ñùhu-ní-yu ichi cuáháⁿ-yu núú úhú núú ndàhú. ¹⁵Te nchaa ñáyiú ñá cúú quini ndéé tnàha ñáyiú-xi cùu-yu datná ìⁿ ñáyiú sahani ndíyi. Te nchòhó sa nàha-ndo sá ñi ìⁿ ñáyiú sahani ndíyi ñá túú ndècu ndihí-yu tnúhu ndee iní sá nánihí tǎhú-yu. ¹⁶Te Xítohó Jesucrìstú ní xíhí-gá cuendá nchaa yíca cuèchi-o, núu xǎⁿ cùtnuní iní-ó sǎ ìo cùu iní ñáhá-gă xii-o. Te xǎⁿ cùtnuní iní-ó nàcuáa cada-o cùu iní-ó tnàha ñáyiú-o, te cuèi na cùú-ó cuendá sá cúú-xí ìⁿ-yu, cuendá-nǎ sá ná dàcácu nihnu-ò-yu núú tnǎndòho ndecú-yu. ¹⁷Te núu ndècu ndihí-o sá cóhó sǎ cáxí-ó ndíhi nchaa sá nǎndíhi-o, te ndècu ñáyiú ndàhú ñá túú vèdana ná ndécú ndíhi, te ñá túú chindee-ó-yu, te ñá túú cùu iní-ó Yǎ Ndiöxí te núu

ducaⁿ na càda-o. **18**Te nchòhó ñáyiú cùu datná déhe-í vá cuendá-ni cùnáha cáháⁿ-ndó sá cúú ìní tnáhá-ndó, chi cuu ìní tnáhá ndisa-ndo te coto tnàha-ndo.

Vá yùhú-ó nùú Yă Ndiöxí

19Te núu ducaⁿ na càda-o, te cutnùnì ìní-ó sá ndécú-ó ìchi ndáá ichi Yá Ndiöxí, te ñá túú-gă ná quihì ìní-ó nùú-gă. **20**Te núu ndìhú ìní-ó cuendá ìiⁿ sá ní quide-o, te sa nàha Yá Ndiöxí te núu ní quide váha-o àdi ní quide cuèhé-ó, chi sa nàha ndáá-gá nàcuáa càa ìní-ó. **21**Te nchòhó ñáyiú ío cùu ìní-í, na càchí tnúhu-í xii-ndo, te núu ñá túú nă sání ìní-ó te ñá túú nă quidé-ó, te vá yùhú-ó nùú Yă Ndiöxí. **22**Te nchaa sá vâha na càcáⁿ-ó nùú Yă Ndiöxí, te mee-gă taxi-gá chi tnèi-o tnúhu càháⁿ-gá, te quide-o nchaa nacuáa cùu ìní-gá. **23**Te ní cachí Yă Ndiöxí sá quèndáá ìní-ó Dêhe-gá Xítohó Jesucrístú, te cuu ìní-ó tnàha ñáyiú-o dàtná ní cachí-gá. **24**Te nchaa ñáyiú tnèi tnúhu-gá ndécü-yu ichi-gá, te ndècu ndihì ñaha-gá xí-yu. Te cùtnunì ìní-ó sá ndécú-ó ndìhi-gá chi ní taxi-gá Espíritú-gá ndécú ndìhi-o.

Ñáyiú ndècu ndihì Espíritú Yă Ndiöxí ndihì ñáyiú cùu úhú ìní ñáhá xìi Xítohó Jesucrístú

4 **1**Te nchòhó ñáyiú ío cùu ìní-í, vá cùtexínu quindáá ìní-ndó tnúhu càháⁿ nchaa ñáyiú càchí sá ndécú ndìhi Espíritú Yă Ndiöxí. Chi díhna-gá cada cuendá váha-ndo te núu càháⁿ ndáá-yu nàcuáa càháⁿ tnúhu Yá Ndiöxí, chi ío vai ñáyiú ñuyíú-a cachí-yu sá càháⁿ-yu tnúhu-gá dico ñá ndáá. **2**Te duha cutnùnì ìní-ó nãndi cùu ñáyiú ndècu ndihì Espíritú Yă Ndiöxí. Nchaa ñáyiú càháⁿ ndáá sá Xítohó Jesucrístú ní quixi-gá ñuyíú-a te ní cuu-gá ìiⁿ yiqui cùnú, ñáyiú-áⁿ cúú-yu ñáyiú cùu cuendá Yă Ndiöxí. **3**Te nchaa ñáyiú ñá túú càháⁿ nàcuáa càa Jesús cútnáhá ní quixi-gá ñuyíú-a ñáyiú-áⁿ dándahú ñáhă-yu, chi ñá túú cùú-yu ñáyiú cùu cuendá Yă Ndiöxí. Te ñu-ní-yu cùu úhú ìní-yu Jèsús. Te nchòhó sa nàha-ndo sá cùndècu ñáyiú cuu úhú ìní ñáhá xìi-gá, dico yúhú càchí tnúhu-í xii-ndo sá sà ndecú-yu.

4Te nchòhó ñáyiú cùu datná déhe-í, ndècu ndihì-ndo Yá Ndiöxí, te ñá dáñá-ndó dándahú ñáhá nchàa ñáyiú càchí sá càháⁿ tnúhu-gá te ñá ndáá. Te ñá túú sàndáá ìní-ndó chi Yá Ndiöxí Yaá ndécú ndìhi-ndo taxi tnunì víhí-gă dàcúxí yùcu ñávâha ndècu ndihì nchaa ñáyiú ñùhu ichi cuehé ichi duha. **5**Te nchaa ñáyiú dándahú ñáhá sá càháⁿ tnúhu Yá Ndiöxí ndécü-yu ichi cuèhé ichi duha, te mee-ni cuendá nchaa sá ìo ñuyíú-a càháⁿ-yu. Te tédóho ñaha nchàa dava-gá ñáyiú ndècu ñu-ni ichi cuehé ichi duha. **6**Te nchoo cùu-o ñáyiú cùu cuendá Yă Ndiöxí. Te nchaa ñáyiú xíndecu ichi-gá tnèi-yu tnúhu càháⁿ-ó, te nchaa ñáyiú ñá túú ndècu ichi-gá ñá túú tnèi-yu

tnúhu càháⁿ-ó. Te duha te cùtnuní iní-ó nãndi cùu ñáyiu càháⁿ ndáá, te cùtnuní tucu iní-ó nãndi cùu ñáyiu dándahú ñáhá.

Cuu iní-ó tnàha ñáyiu-o dàtná cúú ìní ñáhá mèe Yá Ndiöxí xii-o

⁷Te nchòhó ñáyiu ío cùu iní-í, xìni ñuhu-xi cuu iní tnáhá-ó dàtná cúú ìní ñáhá mèe Yá Ndiöxí xii-o, chi mee-gã táxí-gã sá xìní tnùní-ó cuendá cuu iní-ó tnàha ñáyiu-o. Te nchaa ñáyiu cùu iní tnàha ñáyiu-xi cùú-yu déhe Yá Ndiöxí, te cùtnuní ndáá iní-yu sá ndécú ndìhi ñaha-gá xií-yu. ⁸Te nchaa ñáyiu ñá túú cùu iní tnàha ñáyiu-xi ñá túú ndècu ndihí-yu Yá Ndiöxí. Te nchaa ñáyiu ndècu ndìhi Yá Ndiöxí, ñáyiu-áⁿ sãñaha-gã sá xìní tnùní-yu cuendá cuu iní-yu tnàha ñáyíu-yu. ⁹Te cùtnuní iní-ó sã cúú ìní ñáhá Yá Ndiöxí xii-o nchaa-o, chi ní tendaha-gã ìⁿdìi díi-ni Déhe-gá Xítohó Jesucristú ní quixi-gá ñuyíú-a cuendá sá díú-gã cada te naníhí tàhú-ó, te núu na quíndáá iní-ó tnúhu-gá. ¹⁰Te ío cùu iní ñáhá Yá Ndiöxí xii-o nchaa-o. Te ñá díú sã méé-ó cùu iní-ó-gã, chi díhna-gá méé-gã sa cùu iní ñáhá tnàhí-gá xii-o, núu xiáⁿ ní tendaha-gã Déhe-gá ní quixi-gá ñuyíú-a ní xíhí-gá sá cuendá nchaa yíca cuèchi-o.

¹¹Te nchòhó ñáyiu ío cùu iní-í, xìni ñuhu-xi cuu iní tnáhá-ó, chi mee Yá Ndiöxí ío cùu iní ñáhá-gã xii-o. ¹²Te ni ìⁿ nchoo ñáyiu ndècu ñuyíú-a ñá túú xìní-ó nàcuáa càa Yá Ndiöxí, dico nchoo ñáyiu ní tuha ichi-gá chi cùtnuní iní-ó sã ndécú ndìhi ñaha-gá xii-o. Núu xiáⁿ cúú ìní tnáhá-ó ìⁿ ìⁿ-o, te cùtnuní iní-ó sã cúú ìní ndisa-o-gã. ¹³Te cùtnuní iní-ó sã ndécú-ó ìchi-gá, te ndècu ndìhi ñaha-gá xii-o, chi ní taxi-gá Espiritú-gá ndécú ndìhi-o. ¹⁴Te yúhú ndìhi dava-gá cue téé ní xica cuu ndìhi-gá càháⁿ-ndí sá ñí xìní-ndí Jèsús Déhe Yá Ndiöxí ní quixi-gá ñuyíú-a, chi Tátá-ó Dütú Ndiöxí ní tendaha ñàha xii-gá ní quixi-gá cuendá dàcácu nihnu-gá nchaa nchoo ñáyiu ndècu ñuyíú-a núu ùhú núu ndàhú. ¹⁵Te nchaa ñáyiu càháⁿ ní yùhu ñí iní-xi sá Déhe Yá Ndiöxí cúú Jèsús, ñáyiu-áⁿ ndécü-yu ichi-gá te ndècu ndìhi ñaha-gá xií-yu.

¹⁶Te sàndáá iní-ó nì yuhu ñí iní-ó sã Yá Ndiöxí cúú ìní ñáhá-gã xii-o, chi ducaⁿ ìní-gá. Te nchaa ñáyiu cùu iní ñáhá xìi Yá Ndiöxí ndécú ndìhi ñaha-gá xií-yu. ¹⁷Te núu ndisa cùu iní-ó Yá Ndiöxí te vá yùhú-ó òré ná sàá nduu tàudìⁿ ñaha-gá xii-o tnúu nchaa ñáyiu ndècu ichi cuehé ichi duha, chi quide ndáá-ó ndècu-o núú-gã ñuyíú-a dàtná ní quide mee Jèsús. ¹⁸Chi nchaa ñáyiu cùu iní ñáhá xìi Yá Ndiöxí ñá túú-gã yùhú-yu, te núu cùu iní ndisá-yu-gá. Te núu yùhú-yu te xiáⁿ sa ndòhó-yu, chi ñùhú-yu ichi cuáháⁿ-yu núu ùhú núu ndàhú, chi nchaa ñáyiu yùhú ñá túú cùu iní ndisá-yu Yá Ndiöxí.

¹⁹Te cuu iní-ó Yá Ndiöxí, chi mee-gã ndéé cútnàhá vátá quíndáá-gá iní-ó tnúhu-gá sa cùu iní ñáhá-gã xii-o. ²⁰Te nchaa ñáyiu càchí sá cúú iní-yu Yá

Ndiöxí, te cùu úhú iní-yu tnàha ñáyiú-yu, ñáyiú-áⁿ dácuàndehndé-yu. Te núu ñá túú cùu iní-yu tnàha ñáyiú-yu ndècu ñuyíú-a ña, te uuⁿ-gá quidè-yu Yá Ndiöxí Yaa ñá túú xini núu-yu. ²¹Te cächí-gá núu tnùhu-gá sá ñáyiú na cùu iní ñáhá xii Yá Ndiöxí, te ducaⁿ-ni cùu iní-yu tnàha ñáyiú-yu.

Nchaa ñáyiú ní ndacu ní dáñá ìchi cuehé ichi duha

5 ¹Te nchaa ñáyiú sàndáá iní sá Jèsús cúú-gă Crìstú Yaa ní quixi ñuyíú-a, ñáyiú-áⁿ cúú-yu déhe Yá Ndiöxí. Te cùu iní-yu Tátá-ó Dütú Ndiöxí, te cùu iní-yu Déhe-gá. ²Te núu cùu iní-ó Yă Ndiöxí te quide-o nacuaa cãháⁿ-gá, te cùtnuní iní-ó sã cúú ìní tnáhá ndisa-o nacuaa ndècu-o ichi-gá. ³Te núu cùu iní-ó Yă Ndiöxí te tñi-o tnúhu cãháⁿ-gá, chi cùtnuní iní-ó sã ñà díú ìⁿ sá ùhú cúú-xí dàtná cächí ñáyiú. ⁴Te nchaa nchoo ñáyiú cùu déhe-gá sa ní dáñá-ó ìchi cuehé ichi duha, chi ní sàndáá iní-ó Jèsús núu xíãⁿ ní ndacu-o ní dáñá-ó ìchi-áⁿ. ⁵Te nchaa ñáyiú sàndáá iní sá Dèhe Yá Ndiöxí cúú Jèsús ní ndacú-yu ní queé-yu ichi cuèhé ichi duha.

Nàcuáa ní cãháⁿ Yă Ndiöxí cuèndá Jèsús

⁶Te Xítohó Jesucrìstú ní quixi-gá ñuyíú-a, te ní sandute-gá. Te ñá díú-ní xíãⁿ, chi ní xíhí-gá sá cuèndá nchaa yíca cuèchi-o. Te Espíritú Yă Ndiöxí cãháⁿ-xi mee-ni sã ndáá, chi cãháⁿ Espíritú-gá-áⁿ sã Jèsús cúú-gă Crìstú Yaa ní quixi ñuyíú-a. ⁷Te úní testiú ndécú àndiu, Tátá-ó Dütú Ndiöxí, ndihi Déhe-gá Xítohó Jesucrìstú, ndihi Espíritú-gá. Te ìⁿ-ni tnúhu cãháⁿ ndi nùnì testiú-áⁿ. ⁸Te ducaⁿ cùu-xi ñuyíú-a tucu, chi cãháⁿ Espíritú Yă Ndiöxí sá Jèsús cúú-gă Crìstú. Te ní sandute-gá, te ní xíhí-gá sá cuèndá nchaa yíca cuèchi-o. Te xíãⁿ cútnùnì ndáá iní-ó sã díú Jèsús cúú-gă Crìstú. ⁹Te núu tñi-o tnúhu váha cãháⁿ ñáyiú, te váha-gá tñi-o tnùhu cãháⁿ Yă Ndiöxí, chi cãháⁿ ndáá-gá sá Dèhe-gá cúú Jèsús. ¹⁰Te nchaa ñáyiú sàndáá iní sá Jèsús cúú-gă Déhe Yá Ndiöxí, ñáyiú-áⁿ cútnùnì iní-yu sá cúú-xí ìⁿ sá ndáá. Te nchaa ñáyiú ñá túú sàndáá iní tnúhu cãháⁿ Yă Ndiöxí quidè-yu-gá ìⁿ ñándéhdé, dico ñá túú ndèhnde-gá, chi mèé-yu ñá túú sàndáá iní-yu sá Dèhe-gá cúú Jèsús dàtná cächí mèé-gă. ¹¹Te Yá Ndiöxí cächí tnúhu ndáá-gá sá cùndècu-o ndihi-gá ni caa ni quíhíⁿ. Te duha cãháⁿ-gá chi sàndáá iní-ó Dèhe-gá. ¹²Te nchaa ñáyiú na quèndáá iní ñáhá xii Déhe-gá cundecú-yu ndihi-gá ni caa ni quíhíⁿ. Te nchaa ñáyiú ñá túú sàndáá iní ñáhá xii Déhe-gá vá cùndècu-yu ndihí-gá.

Sáhú ndèé núú ní ndihi-ná

¹³Te cuèndá sá sàndáá iní-ndó Dèhe Yá Ndiöxí núu xíãⁿ chídó tñuní-í tnúhu-a cuèndá cutnùnì iní-ndó sã cùndècu ndihi-o-gá ni caa ni quíhíⁿ.

14Te ñá túú tnũhu yùhú cáháⁿ ndìhi-o Yă Ndiöxí, chi tedóho ñaha-gă xii-o nõu ìⁿ-ná sá ná càcáⁿ-ó nõú-gă dàtná cuìní méé-gă. 15Te cùtnuní iní-ó sã táxí-gă sá xìcáⁿ-ó nõú-gă, chi nàha-o sá tédóho ñaha-gă xii-o nõu na càcáⁿ-ó nàcuáa cùu iní-gă.

16Te núu xìní-ó ñăyiu ndècu ichi Yá Ndiöxí te quidé-yu sá ñà túú vãha núú-gă, te ndèhe-o sá ñà túú ní xíta nihnu duúⁿ-yu, te cáháⁿ ndìhi-o Yă Ndiöxí cuendá-yu, te dàcácu nihnu ñaha-gă xií-yu te núu na núcúnu ichi vãha-yu. Chi iò ñáyiu xidó quidé nãndi sá ñà túú vãha te xíta nihnu duúⁿ-yu, te vá càháⁿ ndìhi-gá-ó Yă Ndiöxí cuendá-yu. 17Te nchaa sá cuèhé sá dúhá cùu-xi yíca cuèchi, dico ñá ncháá-xí cùu-xi sá dácuíta nihnu ñaha dùuⁿ.

18Te nàha-o sá nchóó ñăyiu cùu déhe Yá Ndiöxí ñá túú-gă sání iní-ó càda-o nãndi sá cuèhé sá dúhá. Te ducaⁿ chi mee Jèsús déhe Yá Ndiöxí xító ñaha-gă xii-o, núu xiãⁿ ñá ndácú-gă yucu ñãvãha dàxínu iní ñáhá-xí xii-o cada-o sá ñà túú vãha.

19Te nchoo nàha-o sá ndécú ndìhi-o Yá Ndiöxí. Te nchaa ñáyiu ndècu ichi cuehé ichi duha tàxi tnuní ñáhá-nă yucu ñãvãha xií-yu.

20Te nàha tucu-o sá ñùyíú-a ní quixi Jèsús Déhe Yá Ndiöxí ní taxi-gă sá xìní tnùní-ó cuendá cutnùní iní-ó sã méé-gă cúú-gă Ndiöxí-ó. Te ndècu ndìhi-o mee-gă ndìhi Déhe-gă Jèsús, te ìⁿdìi díi-ni mee-gă cúú-gă Yă Ndiöxí, te ndècu dava-gă sá nácuàca ñaha-gă xii-o cùndecu-o ndìhi-gă ni caa ni quíhíⁿ. 21Te nchòhó ñáyiu cùu datná déhe-í, vá quìndáá iní-ndó nchàa sá càchí-yu cùu ndióxí, chi dícó ndaha cue tée ñùyíú-a ní cuáha nchaa xiãⁿ. Te ducaⁿ na cùnduu. Te ío chí cádá ndèe iní-nă vitna.